

元

風

雅

六

三

四

五

六

元風雅卷之十八

東陽吳師道

十臺懷古

姑蘇

百花洲上姑蘇臺
吳王宴時花正開
半空畫燭西子醉
三更鐵甲東門來
吳波渺渺吳山簇
不見嬌嚬倚闌曲
丹楓落月怨啼鳥
碧草東風驚走鹿
闔閭邱墓相連處
應恨夫差迷不悟
斷指千年血未乾
遊魂夜哭臺前路

章華

靈王傾國崇臺宇
按劍章華晚中土
弁裳伏地

走諸侯鐘鼓凌空震三楚騁驕不畏伍子謀落
成乞與吳兵遊孤舟竟走江上路塊土獨枕山
中愁十年伯氣終蕭索回首華容歸不得饑魂
漂泊啼秋煙細腰却舞新王前

朝陽

神娥縹緲高唐上楚宮樓閣森相向丹楓蒼桂
涌孤闕錦石清江簇連嶂行雲冥冥飛雨寒孤
猿咽咽秋花間翠旂龍駕杳何處斷魂殘夢愁
空山微臣宋玉誇能賦當日襄王豈真遇千古
秋風恨未平高泉飛落三巴怒

黃金

昭王銳志移青社築土懸金奉賢者四方劍佩
集強燕千里風塵馳駿馬郭君自舉先羣豪樂
生獨步超凡曹酬恩一雪伯國恥建功並倚雲
天高君臣意氣千年少落日荒墟沒秋草黃金
買貴滿長安惆悵英雄布衣老

戲馬

項王戰馬從東來意氣蹴踏全秦摧入關不並
沛公轡還鄉却上彭城臺重瞳按劍風雲靡萬
足騰空煙霧起淒涼垓下泣名騅零落江邊餘

數騎寄奴千載心爭雄登高把酒臨秋風詐移
晉鼎非男子君看百戰東城死

歌風

沛宮置酒君王歸酒酣思慘風雲飛兒童環臺
和擊筑父老滿座同沾衣一歌豐沛白日動再
歌淮楚長波涌龍髯氣拂半空寒虎士心馳四
方勇河山蕭瑟長陵荒野中怒響猶飛揚高臺
未傾風未息故鄉之情那有極

望思

桐人氣迫前星黯思子宮成歲華晚高臺有恨

碧草新大野無蹤金犢遠一朝弄兵兒罪輕百
年鍾愛天倫深戾園魂魄夜寂寂湖城風雨秋
陰陰漢宮樓觀連天起方士熏香召仙鬼望思
望思終不歸茂陵老淚如傾水

銅雀

半空高棟翔金雀玉宸總帷塵漠漠西陵老樹
暝色寒建安長妓春情薄曲終紅袖辭尊前簷
傾斷甃飛人間分香老淚恨不滅秋風吹入苔
花斑漢家一片當時土肯為奸雄載歌舞銷盡
曹瞞萬古魂落日漳河咽寒雨

鳳凰

金陵王氣飛祥雲鳳凰臺上聲和鳴鳳來春風
花冥冥鳳去秋風荒草生嬌娥舞散高城莫青
山迥隔丹邱路斜陽門巷語烏衣細雨汀州飛
白鷺江空天濶鳳影遙謫仙吟斷誰能招六朝
宮闕煙蕭蕭月明夜半人吹簫

凌歊

大明天子遊南國紅粉三千臺百尺歌鍾激浪
楚日白簾櫳凝樹湘雲碧凌歊高宴金輿來侍
臣狎笑朱顏開臺城宮扉鎖花柳寄奴土障生

塵埃昏昏醉夢春風几不顧江東數千里酒罷
歌闌帝業銷青山空映當塗水

春雨晚潮圖

昔年曾看錢唐潮龍山山下乘春濤中流迴首
洲渚變孤塔不動青厓高雲昏水暗雨陣黑雪
噴電捲潮頭白浙江亭遠亂帆飛西興渡暝千
花濕空江茫茫魂欲斷歸來十年驚復見浩蕩
東風滿畫圖淋漓海氣飛人面春深故國芳草
生鷓鴣夷遺恨何時平重遊弔古惜未得掩卷歌
罷空含情

落花行

東風吹花花作團美人脉脉凭闌干倦投紅筵
逐舞鳳故尋翠袖縈釵鸞去年送別城南道城
南飛花委芳草關河萬里人未歸風雨一番春
又老抱愁無語還深閨拂釵攬袖香依依綠陰
鎖窗蝶影斷空枝弔月鵲聲悲青春不復回遊
子不顧期美人掩淚長相思恨身不似花能飛
花飛終恨沾塵泥安得與花飛去陽關西

秋懷

江南木葉飛江北百草黃風煙澹莽蒼悵望川

途長寒魚聚其羣鴻鴈忽成行俛仰念時物
□耿淒涼昔我二三友敦好攻文章漂零轉
失尺素不得將人生四方志企爾揚聲光登山
豈無車涉水亦有航真誠諒不隔離別庸何傷

其二

忽忽意不懌獨步登高邱羣山紛糾蟠前當大
河流八月草木凋萬里風雲愁寒晶蕩白日孤
鴻去悠悠鴻飛不可極其下禹九州古來英雄
士百戰橫戈矛念我當壯年弗獲茲地遊豈無
干時略欲往誰見收哀哉天馬駒失之為蹇牛

赤壁圖

草荒殘壘怒濤秋遙想英雄涕自流風火千年
消伯氣江山一幅挂清愁丈夫不學曹孟德生
子當如孫仲謀機會不來形勝在狂歌弔古慢
悠悠

送許益之之金陵赴趙侍御招

揚帆千里抱遺經此事光華喜見今青眼憐才
真有道白雲出岫本無心校書燈火西齋靜聽
講衣冠栢府深歲晚幽期良自保孤根未恨遠
穹林

其二

繡斧烏臺峻碧霄金陵佳麗未蕭條詩書正氣
存諸彥花月殘歌笑六朝山倚石頭青入畫□
吞天際白吹潮勝遊健筆追雄渾為寄林間慰
寂寥

東王文學

有客空齋歎不歸鄉心二月亂於絲杏花深巷
春風夢茅屋荒田夜雨詩天氣未佳宜小住人
生行樂竟何時乞君安得千壺酒爛飲狂歌慰
別離

和黃晉卿客杭見寄

一從君客江城去詩思淒涼酒殘空天末倚樓
孤岫雨春深閉戶落花風半生政坐才名誤萬
里誰憐意氣同坐憶王孫詠招隱萋萋草色向
人濃

其二

書問蕭條已半年知君近買過湖船江花日暮
吹紅雪店樹春晴起綠煙客裏光陰遽如許人
間岐路正茫然離羣得似從遊樂紙貴錢唐日
萬篇

送陳生北遊

萬里長風入馬蹄
江干舊隱掩閒扉
乾坤清氣隨詩卷
關塞征塵上客衣
日落太行孤鳥沒
天高燕闕五雲低
提攜喜有王維在
迴首南山莫便歸

和葉自然寓雙溪見寄

膏火錐刀祇自焚
莫將清氣一時分
休文溪上多明月
宏景山中有白雲
詩思凌秋添勝語
丹經叅夜得竒聞
飄飄物外何須恨
漢世公卿貴少文

次韻晉卿北山紀遊

林間尊宿澹襟期不減當年許與支
十載相思不相識雲山應笑俗緣卑

其二

行歌共訪采芝翁絕壑層雲一盪胸
誰念愁吟溪上客落花微雨獨支筇

其三

一壑風煙自可留十年湖海漫曾遊
短衣射虎真堪樂莫恨將軍老不侯

祝蕃遠

饒州教授上饒祝蕃

即席和貫學士月氏王頭飲器歌

單于寶刀寒映雪月氏髑髏飲冤血泥丸真人
辭絳宮曲生時能醉其骨闕氏夜帳蒲萄香拍
拍春霞灑秋月賢王起舞谷蠡歌傳飲歡呼兩
耳熱燈前人影半闌殘燈後青燐已明滅持杯
為爾澆嶙峋胡為對此傷精魂弓蛇猶能致惑
疾智瑤豈是無心人頭顱如此當速朽生禽誤
入仇家手忍將鳴鏑射頭曼吁嗟降王爾何有
後來漢使諾水東猶待留犁撓盟酒